



No sin bessôî. No saressin bessôî, fin dal timp che nus àn samenâts su la Tiere. Fin di chê volte che a àn copât ducj i dinosaurs e dopo a àn lassât cressi i mamifars e a àn sielt tra di lôr chei che a saressin diventâts oms... cul jutori determinant de lôr tecnologjie gjenetiche. Nus àn simpri tignûts di voli. E se no ce saressino stâts i Vimana de Indie? Cjars volants... astronâfs, no?

E il profete ebraic Ezechiele no jerial saltât sù suntune des astronâfs di Jahvè? Dut documentât te Bibie al è...

E chel ogjet volant che si cjate intun quadri di Hieronymus Bosch no isal un UFO ante litteram?

Di che mont al è mont in tancj a àn viodût in cîl sferis luminosis ma mai come tai agns '50... ducj i appassionâts si visaran dal contatist american George Adamski e dal so disc volant. Ma, a pensâ ben, ancje te ultime vuere al jere alc... cui levial daûr ai avions aleâts tai cîi de Europe? Jerino i "Haunebu" naziscj ven a stâi discs volants sperimentâi, o astronâfs alienis? O ai pôre di lôr. O sai che cierts a son tra di nô, cuntun bon travestiment... a samein a nô... ma no son come nô. In Realtât a son come lisertis e par chel ju clamin i "Rettilianis".

Al è un dongje di me a stâ. O soi sigûr. Nol à vite sociâl. Al jes pôc fûr di cjase. Une dì al jere tal curtîl e al fevelave cuntune cane di fier. No. Nol è un mat. Al è un di lôr. Jo mi soi

inacuart de strane lenghe che al fevelave. Al comunicave cuntune base. No sai se cun chê che a àn fat sù di tancj secui te muse platade de Lune... o pûr su chê plui gnove che si cjate in Italie, dongje di Pescara, mimetizade come un distributôr di benzine. No soi ciert dulà che a son ma chel strani om che nol è un om al sta dant informazions su di me...

Prest a vignaran a cjolimi, cuntun disc volant che al samee un cjapiel. Une volte lu ai viodût... al faseve un strani rumôr... un rumôr cidin... come une sorte di vibrazion...

Veju! A son chi! O sint la vibrazion cumò... il gno vicin al à comunicât cun lôr... a son pronts a vignî a rapîmi... o viôt une ombre... Diu... al samee un Haunebu... un cjapiel volant... a son rivâts... dulà aio di lâ a platâmi?

Aromai al e masse tart e mi àn scuvierd...

di Checo Tam

#1049